

四庫全書

集部

欽定四庫全書

石倉歷代詩選卷二百四十四

明 曹學佺 編

元詩十四

貢奎

天遊亭

涼秋馬肥健山行快閒心斜陽衆峰出豈待窮追尋茲
亭獨崔嵬超然散塵襟瑤漢湛虛碧靈飈蕩幽陰澗漾

連沃野蒼茫俯喬林真遊本無馭妙道悟匪深麻姑去
何年樓居集華簪棟宇墀高下薜蘿徑蕭森玄蟬解新
蛻嚙嚙高樹吟物理感時遷世轍徒駸駸懷哉學仙術
孤雲度遙岑

秋日陪大學士趙公憩龍山玄真宮

岩岩居庸關左挾飛仙居蒼茫四山合石逕穿盤紆人
家稍相接林木何森敷觚稜生曉煙玄風凌紫虛念彼
羽流集豈與世俗居溪流轉雲碾餘潤分園蔬鐘磬答

空谷齋供薦芳腴
穹碑紀宗傳道一教乃殊素餐貴
崇本卒歲事耕鋤
漁父在何許空有桃林株坐慚秉
文幹尸祿常曠迂
日暮陟層巔丹霞成長裾遙睇空中
雲超然能卷舒

虎林玄妙觀

琳宮古崔嵬獨據山勝絕天光垂帝座照耀金碧色
修廊接層崖俯目視深澤陰陰木葉暗石削蒼壁冽流泉
出嵌空六月灑飛雪平生功名謀洗我肝肺熱同遊得

幽人再拜摩斷碣興亡見唐漢高爽了吳越更擬窮幽
探馳景忽西滅

登虎丘山

吉士雅巾履具舟約芳遊朝晴出西郭午涼登虎丘松
逕度遙嶺歷此層級修當時吳王劍劓光裂岩幽平甸
眺萬頃閒瞻煙樹稠頗聞山僧賢飛錫下林陬獨遺方
丈室於焉集清流一簞可平生豈惜半日留煮茗試泉
冽樊香延宿籌疎雨催晚歸隨波散浮漚

題董簡卿所藏瀟湘圖

瀟湘在何處展卷心悠然是中浮雲飛上與蒼梧連憶
昔弄扁舟載雪清江天湘君招不來明月在我前微鐘
破征夢落雁栖寒煙回首行萬里攬衣羨孤騫可憐楚
人辭憔悴窮歲年圖畫豈不好此意誰復傳已矣三歎
嗟臨風叩商絃

京城客館

公宇日無事閱書稍怡情浩漫固窮極靜定悟始明籠

禽動幽響庭草遂微生俯念節物變宴處常慙盈寧復
辭勞苦王事驅我行雨餘夕陽漏空雷殷殘聲暄爽倏
未定雲勢方縱橫訪遇當獲趣及茲煩抱嬰何時故園
友濁酒與同傾

雪晴

今晨持我書燕坐雪照屋閉門謝塵鞅展卷自朗讀衆
說初若攻冥思意纔復旭日上團團清泉渙春綠涓涓
晴欄溜洗眼濺飛瀑豈不事遊觀驅馬泥及腹永懷同

袍士歲晚在空谷好風忽東來起翫庭下竹

題雲東軒

城中紛華地借屋得佳處居然俗士駕欲詣不知路門
前柳陰深溪水清可度我行萬里倦頗覺懶成趣有時
忽來坐談笑竟忘去孤雲遂閒適悵望心所寓平生曠
蕩懷落筆題幽素要當居軒冕此理常自悟酒興方未
闌青山任朝暮

邳州

古城結危構交遼哀招延朱碧遞隱見岡迴勢蜿蜒填
車縱橫遊重屋光華鮮扣門多乞食民飢遠流遷桑柘
重藹綠鬱鬱浮蒼煙念此萬里道我舟亦已旋雲樹列
環岫晴鳬散平川烜赫驪珠光隨風墮靈篇神清契高
冥性歛涵靜淵出處古異途世故寧紕纏簡書誠可樂
軒冕非自捐推蓬晚逾恍凝霞助孤騫

袁伯長虞伯生始約同舟南歸既而伯生留京
臨別以雲詩見贈舟中奉和以寄

白雲起西南盤鬱中天臺下招笙鶴翔天風為之迴豈
不從龍遊重輝挾崔嵬翔鶴若有歸華采同燦瓘悠然
忽萬里矧與丹鳳偕鳳栖東海瑤鶴啄北山萊企首思
白雲鳴聲澀餘哀所嗟變化神微雨朝暮來分陰護丘
壑終復遊九垓藉彼明錦章舒卷慰好懷秋旻氣彌清
短翮亦稍開會合須可期乘高共裴回

秋懷

瑤漢夜澄寂烈烈羣象嚴浮雲翕交互圓光尚微纖階

蟲競鳴響濕螢度飛檐持志惕自警屏營以深潛驚颺
度幽幌凝香啓方奩栩栩莊生蝶秉志能養恬雞鳴何
尊尊憂心愧如悵

紀夢

癡兒忽在眼夢覺萬里外寄身如浮雲起坐發長慨所
以棄汝來恩義固有賴讀書雲林齋坐閱景明晦勤懶
出天性責善係亦大我歸須可期秋江斫鱸鱸

答陳華仲

海上三神山上有學仙侶
泠泠紫簫聲吹作飛鳳語
迴飈蕩溟海散落成烟雨
豈無知音者一振九苞羽
持之獻天庭上以奉明主

其二

貧賤交有道富貴多異途
所以古君子擇交嚴所趨
霜劍閉寶室烈士發長吁
隔世或相慕同居分越吳
寥寥千載間羨彼管鮑徒

夢故人

千里萬里道三年二年別鴻雁去復來我友音書絕夢
中忽一見欲語情更切覺來失處所殘缸半明滅相思
各天涯長夜寒慄冽風霜草木變貧賤不易節中心諒
誰知素月當空潔

題淵明圖

若士超世流高風凌飛仙倦懷經濟術嗜酒豈自然去
之千歲間才賢孰相先畏途轍皇皇歸歟袖翩翩日暮
孤雲飛黃花澹秋妍坐憐王弘輩矯首南山巔

即事

藹藹羣樹林孤雲暮來歸紛紛飛鳥倦斂翮相因依臨
軒方獨坐涼飈吹我衣物理固有常悠然悟其機山中
何者樂躬耕自無飢百年事未晚寧勞歌昨非歸歟友
田父一樽聊可揮

賦得新月

團團故園月微鉤畫雲端孤舟天際來湖波正瀰漫但
念時節流不畏道途難晚樹齊弄色晴飈驟生寒歸鳥

哺高林稚子迎門歡夢中倏先至相思強加餐

送別劉道夫

春晚益可愛綠陰蔽前郊念子暫時別我心已云勞浮
雲始舒霽倏見疎雨飄暄爽驟變更豈異世俗交微颺
起林杪清池樹光搖沈憂渺予心衰髮矧漸凋悵焉立
斯須幽禽語嚶嚶

次韻牟成甫

我屋青山下江淨餘霞赤三年臥憂患迹絕城府入扁

舟乘興來獵獵風滿席豈無知心人邂逅談燕集撫物
空自嗟白鷗亦閒適虛名苦勞生干事竟何益

寄公瑾憲史

綠陰蔽深院四月微雨寒羸驂借東隣欲出徒步難簷
樞亦周流於馬足盤桓何苦戀微祿羨彼凌風翰向來
二三友談經舌翻瀾蕭條天一涯出處隨所安念子知
心者重是故時冠

集雲從山

南土氣蒸溽城居厭喧卑官曹稍休暇寄此方駕馳側
逕轉紫曲遙原雜林池煩纓濯微颺前瞻劃舒夷業業
琳宇深松桂交樛枝鐘聲出修廊一飯若有期適意豈
不樂營營竟何為虛談非世具勿遣俗士知素衷慕幽
蹈終焉謝塵羈

雨中

驟熱變風雨氣候一日殊綠樹擁如蓋殘花落無餘間
居日偏永手把種藝書幽幽魚鳥適寂寂車馬疎田父

二三輩濁酒時來俱愁陰每思霽微涼意稍舒攜筇獨
延佇層雲起遙墟

送史高士謁吳閒閒

春水武昌船帆飛敬亭雨孤城厭喧囂聽此檣燕語揮
手謝時人開胸散煩暑煌煌闕下書曳曳雲間侶真人
紫霞佩執簡授璇宇攬衣欲從之神交諒傾許霽雨沐
霄容風微鵠初舉遊心愜高明脫屣邁行旅懷哉會何
時酌彼盈樽醕

陳氏思蘭亭

儼儼春服成浮雲澹微陰行隨越山曲修篁映疎林溪
湍駭遊魚巖花觸飛禽物變理乃常於焉樂幽尋悠然
斯亭上契彼往哲心豈不感陳迹志鬱匪所任猗蘭有
時作亦以絃吾琴武夷參其前行立企遙岑

送鄧提舉之官江浙

天寒道路遙歲晚風雨作虛名諒何為矧此懷抱惡子
行既云邁離居愧余索物盛固有時空山正凋落

其二

江湖起秋風
眯目塵黯曛
挂席飛雲顛
行子歸意滿
寒予如病鶴
欲往翅常短
悵望不能休
城高暮山遠

其三

停車子踟躕
把袂我夷猶
念此離別難
況乃交契綢
雨霽白雲飛
日斜江樹浮
望極意逾遠
愁多身更留
豈無負郭田
何苦事遠遊
歸來亦從人
商歌激高秋

其四

白雲一觴酒離思滄溟間子行勿復居念我何當還杳
杳飛鴻書瑟瑟清鏡顏潛機不私貸歲月忽已闌贈之
雲錦章譬彼蒼玉環何以解塵纓幽泉弄潺潺

贈碧溪翁

雨霽秋色淨新涼方可人溪流碧如染照我鬚髮真平
生作詩苦羞拂鏡中塵為向無菴說歲晚願為隣

拜醮北觀

齋罷啟春服踰履步修廊籠禽動新響雨餘竹風涼道

人房更深爐煙引微香於焉謝塵鞅閒來日偏長

送劉道夫

西菴松篁路雪消沙水清天寒行役倦酒醒別愁生落
日橫車影長雲送雁聲梅花應未發留待照春晴

秋日陪集賢學士趙公敬夫憩龍山玄真宮

山轉疑無地人家近隔村野田秋穫盛岡路晚行喧川
淨雲生石溪平水到門偶尋高士隱相見遂忘言

城南即事

偶出城南去長郊花亂開春陰雲貼水日暮客登臺擾
擾誰知已寥寥自感懷家書幾時發妻子勸歸來

贈孔令尹

百里光山遠三年縣令賢人皆思舊德我欲賦新田綠
霧桑浮野黃雲稻際天風流昔潘岳空作種花傳

試院次韻答吳草廬先生

暫客留應喜微官去恨遲竹高當戶直花重向簾垂對
酒驚人別看詩感歲移山中足幽事猿鶴舊曾期

陽墅道中

馬上千峰列溪行不盡源野船高似屋山縣小如村路
繞田間曲池漫雨後渾靜來應最樂綠樹擁柴門

即事

小雨春寒重吳蠶上箔遲枕歌清夢覺窗掩綠陰垂喜
聽林鴉哺閒看蟻垤移相思故人遠誰與話心期

憶昔

暗憶曾遊地遙看不盡天宿雲連野樹積雨聚溪船故友

疎三益微官負十年閒居成癖性長日枕書眠

遊大梵寺

遠客閒無計微官欲賦歸偶尋幽寺去頗覺俗情非
酒澤飢鷹戀高空獨雁飛西風如有意向晚襲人衣

再和前韻三首

喬木蒼煙合清江旅雁歸功名遺史在城郭舊人非
家遠書猶隔春陰絮欲飛緇塵空滿眼終日到征衣

清溪盤百曲虹影駕橫槎春事怨行客夕陽啼亂鴉
山

明分衆木天濶散悲筇却羨僧家勝推窗瞰水涯
遨遊窮樂事模寫得新詩古寺看山後微風到竹時地
幽塵不到人語燕歸遲向晚寒猶峭惟應客袖知

湖中

片雲將雨過風急滯船行秋水岼無際夕陽山自明沙
平征雁落波靜宿鷗輕滿目蓬窗興窮吟獨未成

居庸關早行

茅屋聞雞起羸驂並轡行澗深孤碓響山暗數燈明細

憶留題處空慚不棄名客愁偏切耳斜月候蟲鳴

槍竿嶺

薄宦辭家遠經秋未得歸直隨山北去却背雁南飛川
淨白雲起郊平紅樹微憶曾留宿處立馬認還非

濟州

舊濟知何處新城久作州危橋通去驛高堰聚行舟市
雜荆吳客河分兗泗流人煙多似簇聒耳厭喧啾

郊行

雙溪溪上路重到五年遲
桑柘成陰處鶯花向老時
泊舟隨岼曲坐石看雲移
政愛沙鷗狎驚飛底見疑

寄示師文妹

川明山秀草花馥氣連鬱儀迴地軸晴嵐宿靄屯
石根飛泉迸寒玉此中縹緲仙人居樓觀金碧繞翠竹
我來曾住纔七日迴首人間白雲速飄搖金衣鶴雙飛
白玉童吹紫鸞曲天聲忽遠奈別何青山送人秋思多
作詩寄女仍自歌梅花零落雪吹盡願拾瑤草山之阿

謝李息齋惠墨竹

湖州墨竹蘇州詩李侯二美能兼之長安塵中忽到眼
坐我六月江南時幽人江南結林屋紫碧森森萬竿玉
清風激昂此君語六月寒生不知暑只今見畫思故鄉
博山日永凝清香人生萬事真適意相對悠然希坐忘
寒食掃松即事

東風微微吹雨晴春山草暖雉飛鳴時哉物性各有適
人生悲樂難為情客行十步九迴首寒食道旁多哭聲

往年攜手原上頭今年酌酒原上丘相逢須識夢中夢
有聲莫帶愁中愁

題山水圖

崖傾水涸石見底石上古樹蟠蒼虬風雲慘淡起白日
發卷令我窮冥搜樹傍衣冠二三子粉墨脫略神光浮
垂竿散策百不憂安得一笑從之遊

濟州

充泗支流魯山麓會濟分河向南北扁舟高枕臥看山

青入齊雲雨新沐六年歸老敬亭閒忘却塵埃道路間
松聲入夢山巖裏驚散風帆去千里

無題

馳道塵香逐玉珂丹樓花暖弄雲和春風漸綠瀛州草
細雨微生太液波月榭管絃鳴曙早水亭簾幙受寒多
少年易動傷春感喚取佳人對酒歌

郊行

馬上看山山不盡客中行路路偏長叢祠社散羣鳥啄

層漢秋高數雁翔疎雨著人絺袖濕微風吹面稻禾香
迴岡偶憩幽塘上顛倒松陰百尺彊

久留翰院思歸

日日思歸未有期夢魂幾度遶園池白雲滿地山深處
紅日當簷雪霽時竹外板輿春步小花間銀燭夜筵遲
好將烏鵲頻占喜便買歸舟泛碧漪

得家書

睡起相思勞寸心捲簾無語立簷陰故人千里碧雲合

斜日半川紅樹深江雁忽傳秋後信隴梅應待雪中尋
天涯奔走成何事輸與寒窗抱膝吟

試院秋日即事

薄遊時覺鬢毛蒼病怯西風夜更長官冷久無金馬夢
院深惟有木犀香歸舟欲解天如水故友難忘客思鄉
試問宋郎愁幾許雁聲何處起滄浪

邳州

荒城十載路重經暫艤扁舟坐驛亭春到梅花何處白

雪晴山色向人青
驚心家遠書難寄
迎面風寒酒易醒
莫憶牽衣兒女態
曉猿霜鶴笑林扃

送謝明遠之官平江

碧波千頃照姑蘇
目送危檣數幅蒲
古寺雲遮丘臥虎
荒臺葉落夜啼烏
黑頭清鏡來勲業
綠幕深衣入畫圖
暇日過遊新得句
秋風應寄故鄉鱸

送汪叔志之南安

繞郭清溪帶路長
衝寒極目送危檣
水涯梅柳傳春信

雪後樓臺照夕陽
杜牧吟邊山鳥去
謝公行處石苔蒼
碧雲暮合天無際
回首相思欲斷腸

槍竿嶺

百折迴岡勢欲迷
舉頭山市與雲齊
經行絕似江南路
落日青林杜宇啼

出郭

水竹亭池十畝間
當時誰似故園閒
無端久客章江上
却羨孤雲得往還

題清溪圖

溪上桃花山下舟六朝遺事寄東流
春風無限關情處猿鶴依然識舊遊

梁山灤次袁伯長韻

積水平蕪渺沒間夕陽漁市網如山
扁舟却逐孤雲去得似鳬翁照影間

帖帖汀荷望眼平微風疎雨葉香清
令人忽憶西湖曲碧蓋紅粧短棹橫

過廣德

黃塵鞍馬夕陽邊不到桐川十二年萬事只多新白髮
虛名何日賦歸田

偶成

潏潏橫塘柳四圍雨餘來看綠陰肥燕翎拂處波如縠
半幅深紅漾落暉

夜況

北風塵海萬波回夜半西窗勢欲摧夢覺恍然超色界

殘燈炯炯妙蓮開

池州郡齋除夜寄呈家君

郡齋寥落夜無眠
紙帳青燈思悄然
不是今生惜今夕
却緣明日是明年

寄友人

別日苦多會日少
平生知己最傷神
王郎玉樹東風外
只對梅花思若人

秋夜

空牀坐對一燈青
手擊蒲團醉欲醒
夜半竹風如雨過
起看明月步中庭

望池州山

少年江上一官閒
老去重來似夢間
欲覓故人行樂處
白雲遮盡九華山

題趙子昂所畫牧馬圖

霧鬣雲鬃出帝閑
誰將圖畫落人間
奚官飽牧無餘事
獨立春風憶華山

題梅溪深處

古寺西邊望眼平
人家何處斷橋橫
東風幾樹溪頭雪
獨鶴歸來趁晚晴

春早

病怯春寒睡起遲
雨聲一夜漲清池
梅花吹落無人管
卻似階前雪舞時

謙上人

西寺廊深日射塵
維摩方丈四無隣
微風盡捲飛花去

半敞東窗映綠筠

絕句

山雨鳴蓬雁落沙
新寒先到野人家
病來誰似愁容瘦
霜樹蕭疎兩鬢華

紡績圖

婦姑紡績夜闌時
月落車寒手轉遲
應愧西隣歌舞散
酒酣春夢繞深帷

附貢師泰

雜詠

疎林收霽靄方池含密陰坐深清晝冷餘花散鳴禽緘
情何所寄撫我綠綺琴世無鍾子期誰能復知音曲終
一長歎悠悠千載心

章華

靈王傾國崇臺宇按劍章華昵中土弁裳伏地走諸侯
鐘鼓凌空震三楚騁驕不畏伍子謀落成乞與吳兵遊
孤舟竟走江上路塊土獨占山中愁十年伯氣終蕭索

回首華容歸不得
飢魂漂泊啼秋煙
細腰却舞新王前

朝陽

神娥縹緲高唐上
楚宮樓閣森相向
丹楓蒼桂湧孤闕
白石清江簇連嶂
行雲冥冥飛雨寒
孤猿咽咽秋花間
翠鈿龍駕杳何處
斷魂殘夢愁空山
微臣宋玉誇能賦
當日襄王豈真遇
千古秋風恨未平
高泉飛落三巴怒

黃金

昭王銳志移青社
築土懸金奉賢者
四方劍佩集強燕

千里風塵馳駿馬郭君自舉先羣豪樂生獨步超凡曹
酬恩一雪霸國恥建功並倚雲天高君臣意氣千年少
落日荒涼沒秋草黃金買貴滿長安惆悵英雄布衣老

望思宮

桐人氣迫前星黯思子宮成翠華晚高堂有恨碧草新
大野無蹤金犢遠一朝弄兵兒罪輕百年鍾愛天倫深
林園魂魄夜寂寂湖城風雨秋陰陰漢宮樓觀連天起
方士秉香召仙鬼望思望思歸不歸茂陵老淚如傾水

銅雀臺

半空高棟翔金雀玉宸總帷塵漠漠西陵老樹暝色寒
長安賤妓春情薄曲終紅袖辭尊前簷傾斷甍飛人間
分香老淚恨不滅秋風吹入苔花斑漢家一片當時土
肯為奸雄載歌舞銷盡曹瞞萬古魂落日潼河咽寒雨

送顧仲莊之海北

釣龍臺下與君別萬里東南何日還星斗動搖天在水
海門空濶浪如山珊瑚寶樹來三島鸚鵡金籠出八蠻

簫鼓船回應北上鳳池春早佩珊珊

送雋御史

萬斛龍驤海上回
除書忽報自天來
紅蓮日轉神仙幙
翠柏霜飛御史臺
已喜文章收俊譽
還因綱紀得長材
風塵滿目難為別
且盡江頭酒一杯

題張子固所藏鮮于墨蹟

一自昭陵藏墨本
書名誰復更超羣
忽傳河朔專行草
不讓吳興變隸分
黃鵠夜深隨落月
白鷺秋冷化孤雲

欽定四庫全書

石倉歷代詩選
卷二百四十四

風流賴有張公子雪繭封題比右軍

題二馬圖

鐵塚騶連錢驄何年墮影江水中蒲梢西來八尺龍天
閑十二為爾空五花雲錦吹東風

附貢性之

西湖燕集分韻得南字

我志在丘壑野性夙所耽今晨適休暇樂此風日堪而
我二三友濟濟皆儒簪扶攜眺西郊到處窮幽探湖光

淨澄練山色浮晴嵐林木葉已脫梅花蘂猶緘言瞻和
靖祠芳草埋空函載登岳王墓老樹雲相參眼明三竺
國金碧眩精藍商歌起樵牧清梵來瞿曇方將履夷曠
尋復躡巉巖去去不知遠落日山腳含美人具清讌畫
舫如雲龕浮游六橋間水天遙共涵

賦得蛾眉亭送胡長史粹中之楚

雙蛾橫翠黛孤亭枕江流伊人適行邁於焉拽蘭舟山
空夕煙斂月白水光浮永懷謫仙人浩歌動清秋風景

欽定四庫全書

石倉歷代詩選
卷二百四十四

三

詎不美公程靡遲留明發指武昌千里路悠悠言從夏
口驛遙經鸛鵲洲王國寔重鎮屹然居上游皇圖永萬
古輔翊在謀猷茲行亦已壯毋使增離憂

清江圖

江驛背孤城江流遶舍清露枰松下奕驛騎柳邊行帆
落晴窗影鐘傳雨寺聲堆床餘簡帙列坐總耆英燕語
能留客鷗馴解結盟詩郵趨堠吏衙鼓集關兵薄俸樽
仍滿新知益屢傾不才翻自愧何以答深情

題畫山水

山水東南勝遊遨歲月遷登高頻折屐載月屢移船
鏡水荷花裏秦雲嶺樹邊猿偷霜果下鹿借石牀眠
野趣閒誰適詩懷靜自便洞深通窈窕澗曲寫之玄
米藥時逢虎看棋或遇仙僧留題竹字鶴避煮茶煙
捷徑惟增愧移文只浪傳種桃春萬樹別有武陵天

題畫蘭竹

幽蘭產空谷無人春自芳綠竹生石間節操凝冰霜
樂

此琴中調寔彼君子堂氣與質隨化歲晚同馨香采之
可紉佩不采蘭何傷

題畫

微雨歇清晝輕雲散薄陰人家隔西崦僧舍傍東林樵
漁斷行屨山水空遺音軒冕詎不貴遊塵如海深披圖
欲懷歸何以諧夙心

牧牛圖

溪童飲牛渡溪水牛過水深行復止人知水深牛不行

誰識回頭顧其子桃林之野春雨晴燒痕回綠青草青
太守勸農當二月土膏肥暖牛可耕邯鄲城頭征戰息
甯戚徒勞吟白石一聲笛裏太平歌牛背溪童自朝夕

唐馬圖

開元天廐多良馬四十萬匹皆龍駒奚官牽出立仙仗
箇箇五花雲錦如許教蕩粟官家給餵飼何曾敢相失
花邊柳下恣長鳴不比鴛鴦甘伏櫪太平天子無戰爭
四海久矣風塵清青絲絡頭玉為轡看花不出長安城

世間豈無千里足往往徒遭奴隸辱如何獨領鳳池春
慎勿從人厭羈束

宮梅圖

璫樓夜寒銀漏澀滿地霜華月先白翠禽啼斷夢中魂
窈窕虛窗碧紗隔千門深鎖含章宮未許人間識春色
只愁笛裏曲聲哀零落香鈿點粧額

林壑深秀為鄧宗經賦

芙蓉城郭自天成長日開軒看雨晴飛瀑曉翻千嶂雪

驚濤秋湧萬松聲
雙雙去鳥風中度
一一遊人畫裏行
濟世功成許歸隱
肯教林壑負深盟

登越王臺次任一初韻

芙蓉城郭自天開
形勢盤回亦壯哉
風作鳴潮吹雨散
山如走馬渡江來
王圖霸業今何在
越寺吳宮莫漫哀
此日明年各何處
更須扶醉一登臺

清燕堂

江山深處畫堂深
朋宴曾聞屢盞簪
弈世衣冠惟望族

百年桑梓尚喬林
珠簾捲雨聽春晝
寶鴨含煙散夕陰
我亦有懷同笑語
圖書堆裏坐鳴琴

送別

江上船開起棹歌
離愁無奈故人何
桃花流水春三月
楊柳東風雨一簑
送別轉嗟形影獨
相思從此夢魂多
到時定有平淮策
勲業終歸馬伏波

送陸景宣靖州從軍

蠻荒溪洞極邊頭
仗劍從軍憶壯遊
楊柳春風千部落

旌旗曉日萬貔貅路經彭蠡洲前過江自巴州峽外流
早報達人歸聖化貂蟬從古出兜鍪

送戴伯貞簡校還廣西

桂江煙水接瀟湘逐客歸來道路長
卷裏謾多新製作匣中猶是舊衣裳
逢人且說身如夢老我相看鬢已霜
此去莫教音問隔雁飛今喜過衡陽

水竹軒

萬竹瀟瀟水遶門九街車馬自晨昏
晴天波影搖窗戶

靜夜秋聲入夢魂
曾為故人頻下榻
每因佳客屢開樽
日年清致今猶昔
春雨深深長子孫

城南耕隱

愛爾城南隱者居
春田遶屋總膏腴
兒孫候暖晨驅犢
燈火分涼夜校書
入社有懷占樂歲
趨朝無夢候公車
相逢自歎飄零久
投老歸來愧不如

次萍居留別韻

且勿長亭折柳枝
離筵已判酒如池
因思會面難期處

直使銜杯到醉時
檣燕留人雙上下
岼花迎客半低垂
計程明日毗陵道
吟寄新詩欲倩誰

贈肖山劉縣丞

野夫于世久無聞
出郭欣逢父老論
何事一從君作縣
催租不識吏敲門
夜燈機杼聲連屋
春雨桑麻綠徧村
他日循良應有傳
肯將名節讓劉昆

有懷夏文度文表昆仲

珍簞生涼簇浪紋
寶爐香煖散晴薰
葛巾白苧消三伏

繭紙烏絲寫八分文字勇追韓吏部詩才清逼鮑參軍
眼中年少多如許獨爾風流莫與羣

題畫

樓倚溪頭水溪環竹外山扁舟垂釣者相對白鷗間

春山煙雨

柳帶輕煙淡淡花含宿雨深深魚樂新添曉漲鳥啼越
覺春陰

題畫扇

三間兩間茅屋五里十里松聲如此山中景色何時共
我同行

東坡竹

玉堂罷值獨歸遲墨潘將秋入硯池坐到夜深清不寐
鎖窗涼影碧參差

畫馬

天閑牽出許奚官飲罷春流未解鞍記得曾陪仙仗立
五雲深處隔花看

觀畫

滾滾長江入窈冥
越山無數隔江青
一雙白鳥誰驚起
衝破蒼烟下別汀

題畫竹

鷓鴣啼斷水龍吟
舟過湘江夜雨深
清思滿懷無著處
閒將墨沼寫秋陰

釣魚圖

賀監湖頭秋水清
越王臺上秋月明
偶因把釣忘歸去

不是來沽隱士名

畫蘭


林下佳人迴不常
倚風無語淡生香
憑誰寫作靈均賦
為爾招魂到楚湘

蘭竹

翠鶯飛下尾毵毵
怪石巉巖倚碧潭
一路鷓鴣啼不斷
行人揮淚濕征衫

題畫

擾擾黃塵沒馬鞍
幾人消得此中間
綠陰清晝深如水
飽看溪南雨後山



石倉歷代詩選卷二百四十四

欽定四庫全書

集部

石倉歷代詩選卷二百四十五
七

詳校官庶吉士臣范逢恩

侍讀臣孫球覆勘

總校官進士臣朱鈐

校對官庶吉士臣潘履翁

謄錄監生臣馮瑋

欽定四庫全書

石倉歷代詩選卷二百四十五

明 曹學佺 編

元詩十五

張雨

寄題劉彥基丹室

昔聞冲虛宮遠在錦江頭往來多異人東望不可求借
問鴻寶書枕中今在否尚餘一丸藥光景夜不收食之

生羽翼飛去十二樓下視何蒼蒼至情久難留我將拾
瑤草遲子于玄洲

題墨蘭贈別于一山之京師

三月愁送客春寒雨如霰冥冥返塞鴻悄悄栖梁燕揚
帆五十日蓬萊望中見欲持猗蘭操一奏南薰殿

春山晴靄圖

危亭面懸瀑深塢著茅堂羣木相掩薄風披如有香避
世真樂土欲往川無梁隱淪倘見招歲暮從徜徉

蘭雪齋為金壇王敬賦

謫僊有妙語清風灑蘭雪高懷千載下子獨慕芳潔春
冰斷瑞花晨露滋弈葉端居味道腴光景庶不滅

晉彥博士以詩索和

鑿磧盛春雨新流遶舍前何當留太白相與學思玄碧
洞無人掃丹梯有路緣催詩古云迫莫笑竦鳬肩

風雪中得金陵諸公書

雪作衆禽驚窗幽亂霰鳴淒然身獲落暮矣歲崢嶸松

竹聊娛拙乾坤苦忌名故人不相貸書札到柴荆

其二

落木從風靡支流越谷斜山空不須說歲去若為遮飢
鶴擣窗紙寒魚嚼雪花推書更清坐席煖到昏鴉

湖寺擁碧軒

喧寂一塵隔湖濱出寶坊荷陰分補袖水氣雜燒香書
勘烏皮几茵敷白氎牀從來已公屋詩客許徜徉

萬致柔還省親舍僕聞而往候道中得此

數里平岡路仙山迹漸分柴荆來鵲語村落去人羣粉
陣松崩雪濤頭日濯雲不緣停僕御直以候夫君

寄洞庭王子正

洞庭山似簇銀闕翠芙蓉安得滄浪子同尋縹緲峰魚
龍隨水落橘柚待霜濃未必桃源似雲帆躡去蹤

孤山晚步寄和靖掌祠懷中庸子

瑪瑙坡前立荒陂接葑田試從樵子徑往聽僕夫泉衆
草寒猶短羣峰晚更妍誰歟結真隱共老太平年

良常草堂圖

隣近方隅洞良常別有天
草堂朝看雨藥圃夜春泉
邈矣盧鴻乙奇哉魯仲連
君看遺世者若箇是神仙

齋居偶興

絕澗多靈石中開小洞房
醉醒依竹素晴雨看梅黃
樹暗鶯聲澀巖虛水韻長
未能超賈馬自足上羲皇

午日東楊廉夫

客有擁琴至吾寧折簡招
足音垂谷口雨氣截山腰
酒

倩紅泉瀉花為絳節朝不嫌泥濘極一舸段家橋

雨中

推枕遽然覺高齋人跡稀捲簾芳草短看雨杏花肥薄
暮寒仍在中林願稍違一遷隨谷鳥喬木是耶非

流杯礪

古木蟠幽礪層巒疊翠臺水歸蒼玉峽風引綠荷杯我
自知魚樂人誰被襖來惜無鼠鬚筆寫記刻巖隈

積雨

飽聽三峰雨間題七月詩水深荷意怯田冷稻心遲
龜黽陰爭盛蛟龍勢亦隨蒼茫不可問身外付雲移

天師素華閣

仙家樓閣風塵表更築凌空月榭高虛白豈知存夜氣
太清還許隔秋毫溪光澹澹水填壑松響離離雪舞濤
此去銀橋迢咫尺神仙直下有靈鼇

寄題陳生華山圖

華岳秋高不受寒虎頭遺墨意蕭閒赤城別有思僊夢

長在明星玉女間

春燒

日落山前野燒生
白茅黃葦地初晴
明朝卻賦雕陵箭
呼酒岡頭看火城

馬遠小景

柳未藏鴉雪未消
春衫遊子馬蹄驕
去年沽酒樓前路
錯認桃花第一橋

王子明求題高侍郎雨竹

雨立修篁似戟枝墨君留影故傲傲房山祇憶巴山夜
及見官奴把燭時

樓居春曉望玄圃

子晉新宮倚太霞繞湖煙火萬人家觀臺一面無人處
日出烟消都是花

張公甫鐵山隱居圖

鐵山曾照鐵衣寒南渡功名有足觀不見元豐全盛日
錢鏐孫子已黃冠

隱居圖

畫橋相餉過溪東
編袂青裙笑語中
何必桃源尋舊路
太平間作祝雞翁

遵道竹枝

簞簞谷口白雲生
雲裏琅玕萬玉聲
驚破幽人春枕夢
一窗斜月半梢橫

石倉歷代詩選卷二百四十五

欽定四庫全書

石倉歷代詩選卷二百四十六

明 曹學佺 編

元詩十六

郭奎

秋日次右司韻

秋水竟長川
高亭對孤嶼
覽君瑤華篇
往往似仙語
觀遊繼晨夕
追昔念徂暑
揚舲濟東湖
采蘭臨北渚
落日

散餘霞輕風度微雨回瞻城堞表樓觀襲空宇渺渺帝
子洲衰草亦淒楚鳬雁相翔翔漁歌起前渚星霜忽已
周遲留感年序睇彼東南天馳思久凝佇

擬古贈別

孟冬霜露降悴彼荷與蒲青青蕙蘭芳采之將焉如贈
君夙昔意聊以慰斯須絃歌屬清響置酒岐路隅親戚
念遠行各言勉良圖常恐不為樂日月方其除晨風奮
高翼北林多古榆臨岐執子手安得同車驅

秋林讀書為章光遠賦

大禹惜寸陰宣尼嘆川逝但恐光景馳及時當自勵禍
亂非所常誰能遯斯世矧伊賢者心怡然與神契典籍
對先聖樂道以忘勢考槃在澗阿衡門復長閉几席不
暫違絃誦日相繼倚桐交前庭雜彼松與桂綠竹植後
園蔬菓亦時藝霜葉初焜黃餘陰值秋霽散帙寄逍遙
臨風復游憩周流同天壤優哉永終歲

送周明卿

秋氣肅已勁茂草凝朝霜重重陵上栢綠葉含馨香薄
言采其華貽爾遠道將服食足壽考卒歲希不忘惟惜
當離別歌竟匪成章願瞻鴻鵠舉思逐浮雲翔徘徊欲
何依美人在西方既怡平生愛狐裘諒同裳義以金石
固情緣歡會長乾餽懼失德君子敦周行

九日偶成

良晨惜難再秋序倏已殫登高啓飛閣望遠俯層巒寒
菊正盈把濁醪方共歡微此一日宴客懷殊可嘆

贈別朱隱居

庭樹悴其芳凝霜一何白
鳬雁方南飛翔翔振明月誰
能弋此物加餐可為悅
念子諧宿歡晤言兩反側
一心抱衾裯衣帶緣以結
斗酒怡親愛聊慰岐路別
思駕雙鳴騶馳彼胡與越
毋為守窮廬悲嘆年歲迫

擬古思友

鷗鳴歲將晏蕙葭淒以霜
思君隔山海道路悠且長
睇彼參與辰清夜悲未央
狂飈西北至一雁方南翔
言念

疇昔歡與子同衣裳安知異寒暑日月不我將天高則
有斗川涉愁無梁憂心隱如愁出戶徒彷徨

送姜彥英還錢塘一首

東南有高樓華月照綺楹瓊筵列海錯雜以絃歌聲疏
簾捲晨夕迴瞰蒼江清君今利攸往我獨懷鹿鳴執手
望長路駕言出東城嘉會常不足何況臨當行晴郊望
樹碧綠渚春蘭生持觴意難盡相思空復情

寄李彥端

嘉樹藹夏綠清風動虛襟念君有高趣勞我徑寸心佇
立東城曲日夕見雲岑以茲世多故忘彼升與沈聊樂
在書籍佩玉懷所欽華池散帙步當戶鳴幽禽蘭生已
覆井泉響迴出林醉將山日月彈作絃上音明月照別
鶴遺音戛南金何當坐松石從爾聽瑤琴

次錢子貢蘇門感懷

燕支木葉落盧龍秋色來空閨有思婦清夜悲且哀錦
書為君寄寶鏡誰人開膏沐不復容綠髮栖浮埃團團

皎月輝照彼單于臺馳心在萬里出戶聊徘徊

雜詩

孤月江上明清光泛流水北有愁思婦南有游蕩子蕩
子行未歸思歸安所止姑老在高堂貧賤復如此君行
忽逾年膏沐誰為理妾心金石堅不逐浮雲起會合良
未期離亂何時已君當復來歸妾當效同死凌風願翱
翔揚波詠杭葦再逐平生歡被服紈與綺

紀夢

忽忽顏芳年搖搖寄行役寢興勞形神鬢髮玄已白驚
風響庭樹憂思日常積夢魂清夜歸彷彿舊鄉邑青松
在園田桑柘蔭廬室飛鳥雲際還牛羊下來夕澄湖澹
微波秋山有佳色雖犬雜比隣墟烟靄阡陌怡怡兄弟
情淒淒丘隴側伐木逢行歌僕夫候馬立臨流濯長纓
挂冠坐盤石似慰平生歡覺來異疇昔百年如轉蓬萬
物乃遺鳥天命良在茲勿復云得失

贈別

蟋蟀悲歲暮起視夜何其淒淒霜露降蕙草颯以衰薄
言子當往軒車發何遲聊因一杯酒慰此平生知采采
西澗蘋悠悠懷我思我思詎能已君心諒不違

貧女吟

猗猗石上蘭青青澤中蒲貧家有美女二八嬌如荼朱
顏不自媚貞固操匪渝少為父母惜生長紅羅襦綺樓
高且深竊恐行露濡一朝零落盡萍迹湖東隅塵沙陋
茅屋不濺冰雪膚鴛鴦懶復織翡翠愁還梳鳴鸞在何

處坐惜華芳，徂恥作商人婦。願奉君子儒，妾心擬有托。
請賂雙明珠。

遊羅漢寺

步出城東門，褰裳涉西澁。幽尋窮四郊，日入未遑已。道
遙遠塵蹤，夕憩空門裏。陰堦轉長廊，金碧炫晴綺。園池
清且深，水竹澹如洗。追念疇昔歡，豈謂重來此。春日忽
載陽，百物含芳卉。好鳥向我鳴，高僧見人起。閒雲石上
生，天花覆瑤几。信宿方告還，行行詎能止。

送劉別駕之饒州

黑貂紫綺裘寶劍千金價冠蓋若雲從相送西陵下我
持鞭君立馬彈銀箏進瑤管漢家才子建安風昔為外
史今別駕鄱陽湖水青如苔東州之民淳無懷匡廬屹
立西江濶蒼翠九疊屏風開逍遙范公堂秋陰落庭槐
嘉政繼前哲南山歌有臺文章揮洒謝康樂皎如遼天
雪中鶴何以折贈千里行汀蘭有芳桂華作青雲論交
金石堅執手欲別心茫然平生意氣凌五嶽擊節起舞

秋風前

春日行

春風爾來何無情忽然吹我華髮生淮南三月花滿城
金尊海錯羅雕楹美人對坐彈鳴箏酒酣起奏升天行
當年歡樂不復得白日為照心未平心未平發長嘯我
曹豈是閭閻兒齊東魯連頗同調

新豐市

過新豐待沽酒雪華當空大如手斷橋荒店無人煙獨

有寒梅伴疎柳憶昔江東未構兵
我亦曾經此地行東家槌牛出新釀
西家開宴還吹笙春風步障千花錦
當壚美人勸客飲形勢雖非漢祖為
彷彿咸陽舊陵寢停驂慷慨懷馬周
我欲濯髮臨清流斗酒不可得高興
良難酬著鞭遙指敬亭路孤雲日暮
心悠悠

夜坐吟

江風蕭蕭吹古樹關月蒼茫海生霧
北斗漸落明河傾城頭烏啼天欲曙
客子不寐憂無衣東征三年猶未歸

蟋蟀在戶歲將暮洞庭霜白芙蓉稀男兒生當百戰死不執金吾即挾匕閉門勿用長夜歌騏驥終能致千里

七夕曲

天河盈盈一水隔河東美人河西客耕雲織霧兩相望
一歲綢繆在今夕雙龍引車鵲作橋風迴桂渚秋葉飄
拋梭投杼整環佩金童玉女行相要兩情好合美如舊
復恐天雞催曉漏倚屏猶有斷腸言東方未明少停候
欲渡不渡河之湄君亦但恨生別離明年七夕還當期

不見人間死離別朱顏一去難再歸

從軍婦

從軍婦良家女新梳北髻學番語狐皮裁帽紵絲衫馬
上佯羞見親故黃巾盜賊亂中華去年燒我父母家大
朝命將專征伐強兵爭奪顏如花顏如花命如葉此身
一失無名節憶昔姑家納采時燈前豫綰同心結嫁夫
誓擬齊蛾眉誰知萬里為軍妻木棉帳低風日惡五紋
刺繡思深閨思深閨難再得人生莫願多顏色東隣女

伴醜且貧鄉里不出成家室

寄衣曲

華燈閨室秋夜長吳刀翦綵為衣裳欲縫不縫心惻惻
還向姑前較寬窄燕山八月雪苦寒羶褐狐裘俱擘裂
明朝驛使催征車白袍絮就愁寫書舅姑已老妾無子
願君早曳玉門裾臨行封裹復致意著時莫遣沙塵穢
和蔡都事見寄

汎汎仙槎遠雲津月未沈水光明使節星采動詞林夙

駕江亭迴前瞻浦樹深瑤華如可拾願得繼高吟

次劉仲孚

地遠孤雲白秋深一雁過淚因明月下心在故鄉多列
郡方傳檄連城未息戈羈危萬里思江上逐馳波

送孫良玉還同安

送君江上去山路雨初晴落日平淮樹春潮帶皖城酒
因今日醉人是故鄉情莫說王孫怨芳洲綠草生

春日游敬亭山

冠蓋聯鑣出晴郊北路分我尋何水部誰似鮑參軍芳
樹聞啼鳥飛泉隔亂雲題詩兼勸酒聊樂在殷勤

琴溪

吾慕琴高子於焉隱適棲松雲生峭壁山雪漲迴溪古
迹行人感新春好鳥啼學仙誠有道安得謝輪蹄

即齋秋日次韻

幕府簡書靜一官清自閒秋聲在東壁爽氣滿西山叢
菊可延壽芳樽聊解顏當軒兩嘉樹好鳥暮知還

出暖水向新營

山陽暖水地舊是北軍屯一澗雲連棧千峰雪照門奉
書觀壁壘馳驛到邊藩為卜歸人信今朝喜鵲喧

留水西寺貽季潭上人

好山吾所慕今日水西遊花雨千峰暝松風六月秋龍
為人聽法僧共鹿尋幽如此林泉樂榮名安足求

秋興二首

月下清砧響夜闌征人不寐憶長安霧迷南國游魂泣

草沒中原戰骨寒直望明河臨象闕誰霑零露捧金盤
十年關塞無家別仗策猶悲行路難

龍門疏鑿禹時功江漢滔滔亦匯東萬古山河今異域
千年禮樂舊同風忽思鱸膾慙張翰將學丹砂就葛洪
祇恨兵戈猶在目秋來衰鬢對飛蓬

答人見寄

自傷孤雁影翩翩避弋南來折復旋塞上牧羊幾陷賊
山中尋鶴托遊仙黃冠偶倩傍人正寶劍誰為烈士捐

華髮秋來垂兩鬢江湖憔悴任吾年

早秋旅夕

初月涼風夜向闌倚樓愁到笛聲殘
天高閭闔銀河白露滴梧桐金井寒
多病馬卿猶是客幾時張翰也辭官
年年怕近清秋日憶殺湖邊舊釣竿

涇縣

涇川不減若耶溪況有招提在水西
四面雲山當縣合五更星斗落簷低
挈舟競訪桓彝廟立馬空慚李白題

但願功成身退早桃花潭上結幽樓

當塗客舍

姑孰溪邊獨倚樓江城二月似深秋孤雲無處求親舍
先隴何人祀首丘花落始知寒食過雁歸渾是夕陽愁
故山應有王孫怨春草淒淒沒盡頭

桃花

窗外碧桃開滿樹看花日日向隣牆自傷春色偏經眼
每惜年芳欲斷腸岸夾雙溪翻錦浪風飄萬點濕紅香

故園欲似天台隔回首東風路渺茫

臘日

臘日三年為異客今年霜雪未全饒
風塵暗滿淮南路霧雨寒生江上潮
鄉夢有時逢骨肉此身何處托漁樵
共來吳楚交兵地烽火依稀似六朝

山中喜晴

山中十日苦風雪霧雨作寒纔放晴
千澗水從松杪落半空雲逐馬頭行
居人向暖分茶樹啼鳥知春喚客名

不惜看花兼問酒東風歸路布袍輕

並頭蓮韻

華蓋高張翡翠圓渚宮深鎖對嬋娟雙瞻太華峰頭月
並是耶溪水上升仙羅襪凝塵駕頸合湘裙濺淚鳳釵聯
只愁風雨遺清恨玉井溫泉共惘然

出五城

五嶺東頭更五城一川如出武陵行人家煙火連機杼
蠶婦桑麻執篋窳春日向暄田鼓急曉溪初漲石梁平

十年歌舞揚州夢，爭似依山閱耦耕。

中酒春

春來中酒朝朝病，擁被高眠懶出門。
草綠漸迷湖上路，花開未到郭西村。
湘娥有瑟催歸雁，楚客無書托故園。
惆悵東風醒亦醉，夢中常是賦招魂。

遊三門山二首

黃茅蓋屋石為門，路轉溪迴更有村。
果樹連園收芋栗，豆花滿地散雞豚。
雲深易就漁樵隱，山遠全忘市井喧。

何獨武陵堪避世此中佳處亦難言

蒼山夾水洞陰陰溪上人家竹十尋田土未饒盤谷好
雲霞全似鹿門深半簷松月斜連榻萬壑風泉響出林
我亦乘舟追李白故人幽賞在鳴琴

次丘太守韻

翳翳桑榆晚正宜夕陽山色望中奇鷗盟遠渚誰爭席
鶴放長松自擇枝疏廣賜金忘得少陶潛束帶怨歸遲
黃花時節牽兒女爛醉籬根且賦詩

夢歸

昨夜三更歸夢惡，滿湖風浪棹孤舟。
山妻化石不知處，慈母倚門猶帶愁。
伯仲凋零傷骨肉，田園蕪沒在松楸。
城頭有樹烏啼醒，斜月照人清淚流。

重憶西巖訪舊

鷓鴣聲中宿雨晴，白雲閒傍馬頭生。
東隣茅屋新煙起，南澗橋頭春水平。
野鳥見多還問姓，山花開盡不知名。
故人宅近青松下，未到柴門已出迎。

開歲臥病

多病文園渴未消自從人日過花朝不知楊柳將春色
綠到淮南第幾橋

一朝臥病藥相扶纔倚晴窗閱地圖莫說江南風景好
王孫頭白怨蘼蕪

寄陳教授敏

松樹連簷翠色多南湖春水澹生波習家舊宅雲林在
明月滿船聽棹歌

贈白紵山庵道人楊玄中

四望亭前姑孰溪道人種玉住山西古松數株秋滿屋
青鳥月明時一啼

書所見

一樹古梅花似雪半臨驛路半臨溪美人玉笛吹何處
零落空山鳥自啼

黃犢飲溪芳草滿青裙挑菜碧芹肥故山好處多如此
湖上春風憶我歸

德興山中

石橋斜日萬山陰
雲滿寒溪雪滿林
獨有梅花看不厭
江南春色故園心

路入深山忽有村
隔溪煙火似桃源
漁舟不喚行人渡
洞裏春寒靜掩門

南康除夜

去年馬上折梅花
今夕匡廬度歲華
風雪苦寒如此土
每因時節恨無家

早發分宜縣

萬山高下宜春路
舊縣人煙亂後稀
荊棘十年生滿道
不堪零露濕征衣

石倉歷代詩選卷二百四十六